



# NATIONALIST DEMOCRATIC PROGRESSIVE PARTY (NDPP)

Facta non Verba

- CHAMPIONING SPORTS
- NURTURING MUSIC & ARTS
- STRENGTHENING ENTREPRENEURSHIP



## NAGALAND - TOWARDS A STATE OF EXCELLENCE





February 25, 2023 nü New Delhi nung University of Delhi pur 99buba Convocation nung linük Tir, Droupadi Murmu-i kaketshir ka nem degree agütsüdüng tangokba noksa nung angur. Kasa noksa nung Union Education Minister, Dharmendra Pradhan-a angur.

### India dak sempet aika lir: Germany Chancellor Olaf Scholz

**New Delhi, Tsüklai/February 25 (Agencies):** Tang Germany Chancellor, Olaf Scholz-i anogo ananü atema India semdanga lir; India aser Germany na tsüngda lenla balala nung tesendaktep tajungba akümtsü nükjidong nung pai India semdangar. Honibarnü Ato kilonser, Narendra Modi den senden amenba sülen pai, India dak sempet aika lir aser Germany-i iba sempetji aginer, ta ashi. New Delhi nung osangbenertem senden nung Ato kilonser, Modi den külemi jembidang Scholz-i, "Asenoki sempet nüngdaker, asenoki teka

mapa shia alirtem nüngdaker. India nung IT aser software kanga renlokdar aser yangi India nung company tajung aika lir. India dak sempet aika lir aser onoki amalitepa inyakba ajanga iba tajangzük aginer. Onoki Germany nung mapa inyaktertem aginer aser Germany nung item sempetji aginer," ta ashi. Tesülen pai twitter ajanga, "India jenjang kanga junga kümogo aser ibaji linük ana tesendaktep atema-a kanga junger. Russia-i rara ayongba ajanga tang alima timtemdar. Chiyungtsü aser energy supplies atema tang inyakdar," ta metetdaksü.

2021 küm December ita nung Scholz-i Germany chancellor tenangzükba agiba sülen pai tang mezüng India linük semdangar. Angela Merkel-i küm 16 tashi Germany chancellor inyaka aruba sülen Scholz-i la melenzuka liasü. February 25 nü pa New Delhi tonga aru aser February 26 nü pai Bengaluru yimti semdangtsü, ta MEA sangdong ka ajanga metetdaksüogo. 2011 küm India aser Germany nati Inter-Governmental Consultation (IGC) tenzükba sülen tang mezüng German Chancellor-i India semdangar.

### PM akümtsü nükjidong nung Nitish-i Congress den longjem: Amit Shah

**Lauria, February 25 (Agencies):** Honibarnü Union Home Minister, Amit Shah-i, JD(U) lenir aser Bihar Chief Minister, Nitish Kumar-i Ato kilonser akümtsü nükjidong nung BJP toktsür Congress aser RJD na den longjemogo, ta metetdaksü. Honibarnü West Champaran district kübok Lauria nung lokti senden ka nung jembidang BJP lenir aser Union Home Minister, Amit Shah-i, JD(U) tongti Nitish Kumar-i RJD lenir, Tejashwi Yadav Bihar chief minister kümdaktsütsü melungogo, aser pai ibaji pai melungba mapang ka nung sangdongtsü, ta metetdaksü. Balmiki Nagar Lok Sabha constituency nung jembidang Shah-i, Nitish Kumar-i Bihar state ya 'arem yimsüsüba'

kümdaktsüogo; pai mapang shia BJP nung denli aser toktsüli ta süa aruogo aser tangbo BJP-i teti atema pa nem kishi shibangtsüogo, ta ashi. Nitish Kumar maneni aija Shah-i, "Jay Prakash Narayan mapang nungi pai akümlü piyong Congress aser 'arem yimsüsüba' anema raraa aruba sülen Nitish Kumar-i Lalu'er RJD aser Sonia Gandhi'er Congress den longjemogo. Pai terenlok atema inyaka liasü saka Ato kilonser akümtsü nükjidong nung tangbo pa ya maongka bushir ka dang kümogo," ta aitsü. "Ram aruogo, Ram ogo' ta asüba agi laktetogo, anungji BJP-i teti atema Nitish asoshi kishi shibangtsüogo," ta pai shisem. Union home minister-isa, taoba Bihar assembly election

nung JD(U) dang nungibo BJP-i menden teimba angu, ajisüaka Ato kilonser, Narendra Modi-i tenangzükba meraksai Nitish Kumar nem chief minister menden agütsü, ta metetdaksü. "Nitish aser Lalu (Prasad) nati Bihar ya tesülen atsüngzuka aliba nungi anitetsü makoktsü. State nung BJP-i sorkar akümtsü mapang tongogo," ta pai metetdaksü. "2024 küm nunga two-third majority ajanga Narendra Modi maneni shimmang aser onoki parnok nükjidongji nokdangtsü," ta pai ashi. Shah-isa Modi-i aniba sorkari Pakistan anema surgical strike aoba, Balakot amakba, Jammu & Kashmir nung Arrla 370 agienba aser Islamic organisation PFI nokdangba metetdaksü.

### Tamil Nadu nung tetsür nem ita shia sen 1,000 agütsütsü: MK Stalin

**Chennai, February 25 (Agencies):** Tamil Nadu nung ruling party DMK-i kibong shia nung tetsüti nem ita shia sen 1,000 agütsütsü, ta nangzükba ama taruba state budget nung ibaji benoktsü, ta Chief Minister, M K Stalin-i metetdaksü. February 27 nü Erode (East) nung by election atema nüboyimba tatembangbuba anogo nung Erode nung lokti den jembidang DMK Tir aser Chief Minister, Stalin-i, party-i nangzükba aser sangdongba ama teti inyaka arur, ta metetdaksü. Election mapang nung DMK-i state nung kibong nung tetsüti shia nem ita shia sen meyirjang kaka agütsütsü nangzükba ama shidak inyaktsü, ta pai metetdaksü. Iba tenangzükba mapa küma meinyakba atema Opposition party temi state sorkar aitsüba mapang ka nung pai iba osang ya metetdaksür. DMK-i aniba teloktep Secular Progressive Alliance nungi Congress candidate, E V K S Elangovan atema

nüboyimtsüba sentong nung jembidang Stalin-i, "March ita nung budget benokba mapang iba scheme benoka mapa küma inyaktsü asoshi anogo sangdongtsü," ta metetdaksü. Chief Minister-i, DMK-i election nung nangzükbatem shilem 85 bo inyakogo aser tanungba ajakji taküm küm tatemlen tashi nungbo inyaktsü, ta metetdaksü. DMK-i state meyong bus nung tetsürtem angati senzüdaktsütsü, sorkar school tem nung tanurtem nem anepdang chiyungtsü agütsütsü aser aluyimertem dang nungi light bill magitsü densema tanungba tenangzükba ajak mapa küma inyaktsü, ta paisa shisem. Erode East by election nung Congress party candidate, E V K S Elangovan anema AIADMK candidate KS Thennarasu-i tokteptsü. Erode East nung February 27 anepdang 7:00 ako nungi election agitsü aser March 2 nü votes zünga election osang sangdongtsü.



February 25, 2023 nü Rashtrapati Bhavan, New Delhi nung Ato kilonser, Narendra Modi-i Germany Chancellor, Olaf Scholz agizükdang tangokba noksa nung angur.

### Lok Sabha election atema tanga party den longjemtsü: Mallikarjun Kharge

**Nava Raipur, February 25 (Agencies):** Congress Tir, Mallikarjun Kharge-i, taruba Lok Sabha election nung nüburtem anemba BJP sorkar atsüngdoktsü atema tanga party tem den longjemtsü Congress-i melunga lir, ta metetdaksü. Hokolbarnü 85buba Congress plenary senden nung jembidang Kharge-i, linük nung maneni temzüng aser democracy anema inyaker, China den arrtsülen linük security tebilemstü lir, osettsüset jenjang kanga atur aser mapa manguba tebilemstü tuluba akümer, ta ashi. "Tang ama timtem tensa ka nung linük nung lenisüba tajung agütsütsüsa aliba party ji Congress dang lir," ta paisa metetdaksü. "2004 nungi 2014 küm tashi Congress-i aniba party temi linük nüburtem tenzuka aruogo. Nübur anemba aser democracy anemba BJP sorkar atsüngdoktsü atema ano maneni

tanga party tem den longjemtsü party-i melunga lir," ta Kharge-i ashi. "Asen linük nübur ajungtsü atema onoki meranga inyaktsü, aser taruba state assembly elections den 2024 küm (Lok Sabha) elections nung takok angutsü atema onoki akokba tashi meranga inyaktsü," ta Congress Tirisa metetdaksü. BJP-i aniba sorkar aija Kharge-i, Delhi nung mena alirtem DNA ji "sensaktertem anemba lir", kechiyong parnoki democracy raksatsüner, ta metetdaksü. Kharge-i, India nung democracy raksatsütsü atema asalentong lir, ajisüaka Congress-i ajak longjemdaktsütsü atema inyaker, ta ashi. Paisa, Centre nung BJP-i aniba sorkari demonetisation aser GST telemtetba agia benokba atema aitsüba den külemi linük temzüng anema maneni inyaker, ta aitsü.



February 25, 2023 nü Ranchi nung Jharkhand Chief Minister, Hemant Soren'er ki anasa National Rural Health Mission nung Contractual health workers-i onük balala nung takhangba agüja longkak aيتدang tangokba noksa nung angur.



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 2

Ukraine Tir Zelenskyy-i China  
Tir Xi Jinping ajuruner

Tamil Nadu nung tetsür nem ita shia  
sen 1,000 agütsütsü: MK Stalin

VOL. XX NO. 135 (ADOK 135) DIMAPUR AMUNGNÜ (SUNDAY)

TSÜKLAI (FEBRUARY) 26, 2023

₹ 5.00

## 14 buba Nagaland Legislative Assembly election atema nüboyimba temogo

### 48 Hours

before the conclusion of poll

Election Campaigning is

## PROHIBITED



Silence Period is Mandated

from today 4 PM

Date of Poll : 27<sup>th</sup> February 2023

Nagaland & Meghalaya Assembly Elections 2023



**Kohima, February 25, 2023 (TYO):** February 27 nü 14 buba Nagaland Legislative Assembly elections atema nüboyimba maparen tanü nikonngang 4:00 ako nung tembangogo.

Taküm election nung political party 12 nungi tetsür 4 dena candidate 183 aser independent candidate 19 tokteper. Menden 60 agi akümba Nagaland Assembly nung parnoki menden 59 atema tokteper.

Hombar February 27 anepdang 7:00 ako nungi polling tenzüksü aser March 2, 2023 nü votes azüngtsü.

Zunheboto district kübok Akuluto constituency nung BJP candidate aser tang teinyakdak MLA Kazheto Kinimi den tetokteper shinga mali takok nguogo.

Assembly Constituency 59 nung candidate 183 indang taji vote enoktsür nisung 13,06,909

### Dimapur nung tetsürtemi polling station 36 ketdangtsütsü

**Dimapur, February 23, 2023 (TYO):** Dimapur district kübok polling stations 36 tashi tetsürtemi dang ketdangtsütsü aser ibaji magistrate nungi 4th grade staff tashi lir, ta Dimapur Deputy Commissioner aser District Election Officer (DEO) Sachin Jaiswal IAS-i metetdaksü.

Election mapa atema polling ketdangtsür 860 mapa lezmükja lir aser ketdangtsür 258 tashi extra reserve nung yua lir, ta Sachin-isa ashi.

Burma camp aser Phaipjang nung facilities ajak aliba model voter friendly polling station ana renema lir, ta paisa shisem.

Dimapur district nung election tiptema aser ochishia agitettsü atema para military

forces peria aruogo ta DEO Dimapur-isa ashi.

Dimapur district kübok Assembly Constituency 3 lir aser iba nung vote enoktsür ajak agi nisung 1,20,864 lir. Parnoki Polling Stations 172 nung votes enoktsütsü.

Deobar, March 26 anepdang 9:00 ako nungi polling ketdangtsürtemi election materials bener pei pei mapa lezmükdaka aotsü.

1 Dimapur I nung vote enoktsür ajak agi 24943 lir. (Tebur 12793, Tetsür 12150)

2 Dimapur II nung vote enoktsür ajak agi 58292 lir. (Tebur 28882, Tetsür 29410)

3 Dimapur III nung vote enoktsür ajak agi 37629 lir. (Tebur 18633, Tetsür 18996)

### Kohima gari lendong nung nisung 37 yiru

**Kohima, February 25, 2023 (TYO):** Honibarnü Keyakie (BSF camp) Kohima nung Dimapur-Satakha tsüngda senzüba bus gari ka tsükokdang nisung 27 yiru.

Tanep 10:30 ako meta private passenger bus (ML05-C-4711) jagi taxi gari ka anena aliba nung atsükba sülen lungreni feet 85 shi lua tsükok ta osang

angazüker. Iba bus gariji Dimapur nungi Zunheboto district kübok Satakha-i aodang lendongji ajuru.

Lendong atalokdang bus nung mena aliba passengers 24 aser taxi nung mena alir nisung 3 yiru aser parnok rongnungi nisung pezübo kanga mejungi yiruba agi ICU nung anepaludar ta osang angazüker.

ajanga yanglutsütsü.

Voters tajemtiba aliba Polling Station ji 40 Bhandari assembly kübok 71-Merapani lir aser iba station nung voters 37 dang lir. Külen, voter teimtiba aliba polling station ji 32 Atoizu constituency kübok 12-Usutomi Polling Station lir aser iba station nung voters 1,348 lir.

Assembly Constituency rongnung voters teimba alibaji Chumoukedima district kübok Ghaspani-1 A/C (voters 74,395) lir aser tajemtiba alibaji Mokokchung district kübok Mokokchung Town A/C (voters 8,302) lir.

Taküm assembly election nung Nationalist Democratic Progressive Party (NDPP) aser BJP tsüngda menden 40:20 lemsar tokteper. NDPP lennir Neiphiu Rio-i chief minister ser kümsük tanabuba atema sorkar akümsü meranger.

NDPP aser BJP ajanga Prime Minister Narendra Modi, Union Home Minister Amit Shah, BJP national president J P Nadda, union minister Sarbananda Sonowal, union minister Kiren Rijiju, union minister Rajeev Chandrashekar, union minister John Barla aser Assam Chief Minister Sarbananda Sonowal den

tanga BJP national lennirtem anir arua nübo yimogo.

Chief Minister Neiphiu Rio-i anir NDPP star campaigner temia Nagaland kübok constituency ajak asemtsü merangogo.

2018 assembly election nung Naga Peoples' Front (NPF)-i menden 26 nung takok ngua liasü saka taküm parnoki menden 22 nung tokteptsü tenüng agütsü. Ajisüaka NPF candidate kati metokteptsü lemetba ajanga candidate 21 dang kümogo.

NPF-i election magidang tanga political party kecha dena tesentaktep yua mali saka election tembangba sülen tanga party aser candidate tem den longjemtsü mulunga lir ta Kuzholuzo Nienu-i metetdaksüogo.

Congress-i 2003 tashi Nagaland madak yimsü süa aru aser tang assembly nung parnok indang MLA ka danga mali saka 14 buba NLA elections nung candidate 23 tokteper.

2015 küm Congress MLA 8-i NPF den loktepa liasü aser taküm election nung Congress-i tetsür candidate ka den lanur aika shima lir.

NDPP, BJP aser NPF-i constituency balala nung star campaigners anir lokti sentong tulu ayonga agiogo saka

Congress-ibo media sabang balala nung osangtem prokshir aser sorkar aitsüba onük aika metetdakja aruogo.

Congress-i sorkar akümba nung BJP denbo melokteptsü saka kasa tangatetba aliba secular front nung adentsü ta shiogo.

Congress-i Dimapur nung lokti sentong tuluka ayonga agi aser idangji AICC president Maillkarjun Kharge, National aser State Congress lennirtemi o jembia liasü. Külen, Congress MP Shashi Tharoor-ia Kohima nung lokti sentong ka nung jembia.

Taküm election nung National People's Party (NPP) aser Nationalist Congress Party (NCP) nungi candidate teranana (12) lir.

Maneni, Lok Janshakti Party (Ram Vilas) nungi candidate 16, Republican Party of India (Athawale) nungi candidate 8, Janata Dal (United) candidate 7, Rashtriya Janata Dal candidate 3 aser CPI o Rising People's Party candidate kaka lir.

Meta talang pilar aliba polling stations nung election mapa lezmükertem tanü Honibarnü apusoa ogo aser külen tanüngba election ketdangtsürtem asüng pei pei lezmükdaka aotsü ta osang angazüker.

### Vote enoktsür ajaki ochishia shilem agitsü ayongzöker: WAYF

**Dimapur, February 25, 2023 (TYO):** Taruba küm pungu atema Nagaland Legislative Assembly nung teshimtet nübotem yoktsü atema maongka ka asenok dangi tonga aruogo ta Western Ao Youth Federation (WAYF)-i metetdaksü.

"Vote enoktsüba ya asenok nem temzüng ajanga temeten agütsüba dang masü saka democratic loktiliba ka nung senso shia atema teinyaktsü tulutiba lir. Anungji onoki vote

enoktsür ajaki pei lezmükba mapa inyakttsü ayongzöker" ta Media Cell, WAYF-i sangdong ka nung ashi.

Nagaland nung election agidang senso ajaki nübor asoshi ola adokba lennirtem shimtetsü mepishir. Proxy voting malitsü aser clean election agitettsü atema vote enoktsür ajaki shilem agitsü ayongzöker, ta parnokisa ashi.

Aor kari dangi vote enoktsüba maparen nung timtem mesüra

tenokdangba kar danga ajurura Helpline - 8974851911 ajanga WAYF nem osang agütsütsü parnokisa metetdaksüogo.

Onoki senso ajak dang election tiptema aser ochishia agitettsü aser tensa meraksatsü atema mepishir. NBCC ajanga mangdang ayuba Clean Election Movement tangatetba nung vote enoktsür ajaki pei mulungba candidate nem vote enoktsütsü nenshir, ta WAYF-isa metetdaksü.

### CEO Nagaland-i anir state ketdangtsürtemi Mokokchung semdang

**Dimapur, February 25, 2023 (TYO):** February 25, 2023 nü Chief Electoral Officer V. Shashank Shekhar, IAS, Home Commissioner Abhijit Sinha, IAS aser DGP Rupin Sharma, IPS nungeri Mokokchung nung political party aser civil society tanishirtem den senden ka menogo.

Iba senden ya Deputy Commissioner & DEO Mokokchung ajanga ayonga DC Conference Room nung amen.

Mokokchung district nung election dak sendakba tatalokbatem Election Commission-i angashiogo aser iba jagi tensa osang metetpelatsü atema CEO, Nagaland Shashank-i anir ketdangtsürtemi

Mokokchung semdang.

Senden nung CEO-i political party tanishirtem dang Candidate/ Party kari danga Model Code of Conduct alema inyaksangshiba metetra osang sangokjang ta ashi.

Polling maparen tembangba sülen candidate kari danga ozüng alema inyaksangshiba metetra ozüng tapet agi merenshitsu, ta Shashank-isa metetdaksü.

Candidate kari danga aibelenba osang angashira webcasting recordings rebrangtsü ta Home Commissioner Abhijit-ia ashi.

DGP, Nagaland Rupin-ia party tanishirtem dang tensa raksatsüsa mapa meinyaktsü atema nübotem nem osang sangoktsütsü ayongzük.

Lendong ataloktsü akok ta

bilemba polling stations ajak nung security personnel talila lezmüktsütsü ta paisa metetdaksü.

Ao Senden, Watsü Mungdang aser Ao Kaketshir Mungdang nungi teshimtet nübotem dang CEO-i anir ketdangtsürtemi külem nübotem dang tensa meraksatsü aser ozüng alema meinyaktsü osang prokshitsu ayongzük.

Mokokchung district kübok tesem kar nung election dak sendakba lendong atalokba atema sasaa bilemer saka akok tashi parnoki district election ketdangtsürtem den amalitepa election dak sendakba lendong matalokdaksütsü merangtsü ta Ao Senden aser Watsü Mungdang tirtemia ashi.



## TIR YIMYIM YIMOBILEM (EDITORIAL)

DIMAPUR AMUNGNÜ, TSÜKLAI (FEBRUARY) 26, 2022

### Ozü kibongibo Kibubasa tenzüksü

**Y**ihusua aser par kibong asoshi Yehovah Tsüngrem tenzüksübaji ozüng masü saka par mulungba nung shimtetsüba mapa ka liasü. Anungji Egypt nung alidang par tsüraburtemi külemba süngyanglu aser bendanger tsüngremtem tenzüksübaji pa mulung liasü. Aji oda, külem alir nübertemi külemba süngyanglu külema parnok tamangba yimsü aser libaliro den lirumedema aotsübajiang Yihusua asoshia temela liasü. Ajisüaka, Yihusuai par tebuo Abraham limapur asüba tia nungi Tsüngremi kümzüka aniteter külen Isak nungi Yakob aser Yakob nungi Israel nunger kin 12 tashi küma rendaktsü aser Egypt nunger yawara nungia Yakob'er jabaso Yosef-iang parnok kümzük aser Egypt lima nung Israel nunger alar tia nungi kümzüksü asoshi Mosa aser Aron na yok aser tena leniba nung Tsüngremi parnok temerem tzüim aser Yordan ayong ajanga Kanaan lima tashi anir aruba, kasa Tsüngrem tashi aser taochi indangji metetba dang masü saka pai mamadok. Atangji, temerem tzüim ajanger külena Kanaan lima agitsü asoshi Israel nungertemi lenmang nung tsükchir aliba lima aser yimti aika ajuru saka parnok asoshi Tsüngremi tongpang raratsü, anungji tongpang tulu süaka melamelaa kokyonga ao. Ajisüaka, Kanaan lima tongerbo Israel nungertemi par tebuo Abraham, Isak aser Yakob Tsüngremi parnok dang aochiba mapatem amadok aser Tsüngrem teka agi temerem tzüim sadanger adoker aser Yeriko yimti talong dang along nung chirepdaktsürtem aser parnok chirnurtem to agi Yehovah Tsüngrem amadok. Parnoki mapang kabo, parnok Egypt nung alar liasü ta asüba otsü to amadok aser bendanger tsüngrem dangi meyip aser taküm Tsüngrem külemtsü melena süngyanglu külem. Ajisüaka, nübertem tia ajung, parnok tanishir Yihusuaibo parnok lenir Mosa ajanga Tsüngremi parnok alar tia nungi anitetba Kibuba Tsüngremji dang tsüngremtem madak Tsüngrem aser kiburtem madak Kibur ta par taküm, tanüla aser temulungjang ajak agi amang, anungji iba Yehovah Tsüngremi dang Israel nem takok aser temoatsü agütsütsü ta paibo amang. Iba tamang jagi Yihusuai par lima aser nübertem nem dang masü saka par kibong nema temoatsü aser tekümzükba agütsütsü ta angateta liasü. Ajisüaka, Yihusuai par nübertem dang kechisüdirsäka pai amangba Kibuba Tsüngremjiang amangtsüla ta ozüngsa magütsü, saka pa arishi tatembang nung pai nübertem dang Tsüngremi Ur lima aser Egypt lima nungi aniteta tenangzükba lima tashi anir aruba Tsüngrem taochi otsü dang metetdaktsü. Tanü Yihusuai Israel nungertem dang akhi parnok alar tia nung aliba otsü ashiba amaji, asenoka asen tsüraburtem süng long külemba mapang, shiruru ama aliba tia nungi asenok nisung mesüka kümdakja anitetba tesüngmangtsü otsütem asenokia meteta lir. Ajisüaka, asenoki item tensa tia nungi asenok taküm aser tanüla kümzükba Tsüngrem temeim otsü ajak amadoker, tanübo Mosa aser Yihusua Tsüngrem masü saka alima rongsen aser ochimashi mapatem külemer. Asenok temanga mangsa aliba tia nungi Kibuba Yisu temeim ajanga mesamai kümzük ser nung, Tsüngrem masü saka rongsen külemertemji asenok kümogo. Yimten nunga aser arogo nunga tenzükertem ajak Tsüngrem masü ita sen külemer kümogo. Aji oda, asen taküm mapa reprangdangra, asenoki Kibuba Yisu masü alima shi jangraba, ochimashi aser tashiyim tsüngremtem tenzükter. Iba ama mapang ka nung, asenoka shiba tenzüksü? Ochimashilen nungi melamelaa takar kümdaktsüba tsüngrem tenzüksü asü? Noah mapang nung ama, lembula melembula ta masü pei tenük dang ajung shima shima kibong kümdaktsüba tsüngrem külemtsü asü? Tsüngrem tashi nung masü saka tashiyim agi takok ngudaktsüba tsüngrem külemtsü asü? Aji asenok mulung. Ajisüaka, koba tia nung lidir liang aser telok tulubai koba tsüngrem külemdir külemang, Yihusuai Tsüngremi par nübor aser par kibong kümzükba indang mamai " ni aser ozü kibongbo onoki Kibubasa tenzüksü," ta Yihusua 24:15 nung shia aliba ama, asenokia asen mulungjang ajak agi asen tsüraburtem nem tekümtet agütsüba aser asenok kümzüksang Kibuba Yisu Khristasa tenzüksü ta shitetsüla. Atangji, iba jagi na aser nür kibong kümzüksü.

## OLEMSABANG

### TSÜNGREM OKAR AJANGA ASEN NÜBURTEM DEN KURET KAR LEMSATEPNER

~ Mrs. Bendangla Imchen

Aor, aotzürtem dang Tsüngrem O kar ajanga asen nüburtem den kuret kar lemsatepner.

1. Tanü aor tular yimsüsür, tashi temeteter, takar, waluner, nenok aküm nung Tsüngrem nübur, Pa dak amanger kibong, kija ajak dang Tsüngrem O (Temeshi Lai) nungi kar agiteta nenok den lemsateper,
  - (a) Shiba tematiba jenokdak alir, pa ajak takoksang akumpok nung alitsü.
  - (b) Pa kü jenokdak, kü mitsa, kü Tsüngrem shiba dak ni amanger. T.Ken 9: 1-2
2. Shiba Kibuba dak tamang akar, shiba tamangbaji Kibuba lir pa temoatsüka. Yeremia 17:7
3. Ne O kütsüng asoshi milen, aser kü leman asoshi tesangwalir. T.Ken 119: 105
4. Tang anungji kü chirtem kü dang angang kechiyongkü leman jajartemji temoatsü. Apijemtsüshin 8:39
5. Kü dang jaang aser ni ne dang langzutsü, aser miim mapa tulu, koba nai memetet ali ne dang ashitsü. Yeremia 33:3
6. Sher ajemalurtem lir, parnok tepelatsü kechiaser parnoki alima semang amangtsü. Mtt. 5:5
7. Kibuba bushiang aser temenen nungi pila ang aji ne shi asoshi taneptsü aser ne teret asoshi mozü alitsü. Apijemshin 3:7-8
8. Tsüngrem külembaji kü tashilir pai kütsüng mesütsüng ama kuemdaktsütsü. Habakuk 3:19
9. Tamajung agi tekodaktsü, saka tajung agi tamajung kokdakjang. Rom 12:21
10. Saka Tsüngremi tashitemeterertem maksudaktsütsü atema alima nung shisa makabatem shimtet aser tashi taitbatem mak-sü daktsü alima nung tashi maitbatem shimtet. 1 Korinth 1:27
11. Solomon Chuba menden nungi tatempang O tatempangji ya ajak angadangogo Tsüngrem tsübuang aser Pa ozüng benshiang kechiaser nisung teinyaktsü mapa ajak agi ojang kechiaser tajung sua-ka tamajung sua-ka miima aliba ajak den Tsüngremi mapa ajak o bendangtsü. Sayutsüngir 12:13.

Putu aia otsü obu Tsüngremem semang teti tatem makaba semang liasü asen putu nem agüja yutsür par putu tempanga aruogo, saka par-i yutsüba senmang, ajak senzüka yutsür, sen aser yi temesepba, mozü koba takum tanela ajak yokadokogo, Tsüngremi mapang beria dang ataogo lbri 2:4 nung shia alibaji mulungsentsü ajak agi tekumtetta alibaji kodanga jenamaoba kotaker semang tulutiba asen nem agüjaa lir, saka tanu aseni sentokogo, iba sempetji tanua takum bendanga takum melen Tsüngremi iba tekumtet meyipa agutsütsü atasa lirta Lai O jagi asen den jembir. Kechiyong Pa chir Yisu-i pa amozuka ao dang pa tepsetertem aser menenpur ajak ne angadi tekumtetji agutsür. Pa amozuka ken atema ao pa tanaben mapang mashi ka nung arutsü. Pa dak amangertem ajak renema atati Tsüngrem Oi ayongzöker.

## CLEAN ELECTION

~ Lanu Atsongchanger

Election, election ta! Ya kechi?  
Na juri sen bententsüba maongka asü?  
Na juri ali lim alitena ayutsüba maongka asü?  
Nebur arakmoka ajempangtsüba yimli anguba asü?  
Asen lima yanglutsü atema masü  
Saka asen tepok asungtsü dang bilemba kin.  
Ya naibo khendanga meshisadanger no?  
Arung asen atep khen merektetsü apusodi.



Kotak nungi Tsüngremi alimaji yimsü aser,  
Saka Tsüngremi iba mendenji azungteta yutsür  
Ali neburtem teyujena yimsü asütsü  
Tsüngremi Pa menden ne nem agütsü.  
Tsüngrem melena nai yimsü asü dang,  
Oh! lenirtem, Tsüngrem akum tsüba,  
Ne ashi metet aser tasatemji nebur atema,  
Asen lima ajangzüksü asoshi asa-angma.

Nai alima nung sentsü sayunedang,  
Ne tanela tangatetba nükmen  
Alima rongsennek tekodaktsü,  
Ne tanela jenjang nebur nem tashioktsüma.  
Oh! asen neburtem,  
Election arutsü yongyatepba kin,  
Election sen mangputepba kin,  
Asen senti meyongnem sen yong ayokba kin.

Arung asenokbo asen tangatetba,  
Asen shisatsü tera melenshidi.  
Sen chitsütsüba masü,  
Saka asen lima terenlok nung ranglokdi.  
Nebur ola angashiba yimsüsür aseni shimdi.  
Asen lima terenlok atema tasü ita nokdaker shimdi.  
Asen lima atema mulungsentsü temerük lenir shimdi.  
Tsüngrem akumtsüba lenir asenoki shimdi.

Asen meyonger dang asen mangdang shidi.  
Par nem asen lima terenlok atema tasa agütsüdi.  
Asen tamang agi asen lenir nungitdi.  
Asen senti meyongnem sen yong yoka mechili.

Amen

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**



# Tenla kidang Pastor sarasadem ajanga auer telok ka nokdangtet



February 12, 2023 nü Ferguson, Missouri nung aliba All Creation Northview Holiness Family Arogo Tenla kidang pastor leniba nung Arogo nungeri prangpong bona aliba telok ka nemeta sarasademtsüdang tangokba noksa nung angur.

**February 25, 2023:** Ferguson, Missouri nung aliba All Creation Northview Holiness Family Tenla kidangi prangpong amer telok ka auyatsü nükjidong nung aru, ajisüaka pastor leniba nung Arogo nungertemi parnok asoshi sarasademtsüba ajanga auer telokji nokdangteta liasü. Pastor, Marquaello Futrell ya taoba mapang küm 10 tashi police officer inyaka liasü. Osangbener den jembidang pastor-i, Amongnü (February 12) tekülem sentong agiba mapang nung Tanela Temeshi ajanga auertemji nokdangtet, aser tekülem sentong agidang tatalokba ajakji Facebook Live ajanga sayua liasü, ta metetdaksü.

Pastor Futrell-i, "Nisung ka yangkhu ana bener Tenla ki telungi aitba sülen Christian Education Director dang asüngdangya tenzüka liasü, ibaji ngua ni kanga aoksa. Langka tamajung ataloktsü, ta ni bilema liasü," ta metetdaksü. Mapang tatsüka tsüingda ano nisung pezü sü agi tejak nembanger Tenla ki telungi ait. "Ni taoba mapang police officer ka liasü, anungji ni parnok tekanük nung lisü mesüa alibaji ni meteta liasü," ta pastor-i ashi. "Auer telok nungjagi nisung kati prangpong ali nung tsükdaksü. Ni Arogo züingsemtem metsübudaksütsü atema maneni tekülem agia liasü aser police nem iba osang

metetdaksü. Ni maneni tekülem sentong ania sarasademba mapang nung auer telok nungi züingsem ajakji tesülen aliba menden nung amen," ta pai metetdaksü. Iba sülen pastor-i Arogo züingsemtem dang nisung tasen Tenla kidangi aruba atema tenüngsang agüja parnok atema sarasademtsü ayongzük. Parnokji Tenla kidang nungi auyatsü nükjidong nung aru, ajisüaka Tsüngremi parnok sentong melentsü, ta pastor-i ashi. Ferguson Police Department-i ashiba agi, nisung pezüji Tenla kidang nungi aluba sülen gari ka nung meyipa ao, ajisüaka police-i maneni bushisüngdangdar.

# ANO GO ABEN TSÜNGREM DEN

## ASÜTSÜ AGÜTSÜBA TAOCHI

"Alima tatem tonga, nenok ki kulitem asütsü"

- (T. Mapa 1:8)

Kulisür kaji odangbo meshimer saka pai/lai tenük agi angutsüla, metetsüla, ajemshitsüla, jangjaa metetsüla.

Asangsang nung temsüa alitsüla. Pa /la dak khuli tapensa akatsüla. Tapi agi dangbo khuliji mesüteper. Iba jagi dang Mathi 22: 14 "Kechiaser aika ajar saka ishika shimteter". Aser ishika shimetetba rongnung na/ni densemdaksüba taochiji ulura.

Chuba kati par jabaso asoshi kiyir benjong renem aser pai kilirtem yoka lenmang lenjem ajaki oa nüburtem jaten. Iba putu nung shiri iba benjong ayonger parnok chiyungtsü aser kiyir sobutsüji angati kiburi agutsü aser ibaji sour benjong anogoji süidaksü. Kodang kiyir kiburji kilongi ait aser repring, saka idangji kiyir sü mabenba adianu ka angu aser iba nisung tetsüng teka alener teti tatem maka tammangdak inoktsütsü kiburi mela aser inoktsü.

Iba nungi lesson ka angur, tajar rongnungbo aden saka shimtok, khulisür ka asütsü taochi agütsü saka metoktsütetba temenen ka ajanga teti tatem maka tasü angu, ibaji majangzüktsüsa iba lesson nungi angazükdi.

## AO KIN ASER ELECTION

- Mrs. R. Mapukala. Pongen, Tzürangkong Merangmen

Ayatai !! Ayatai..Ao oshi nung tematiba tansütsü ola. Iba dang temaba ojang kar naia pilemteter asü? Tanü tendak ya kichi ataloker taaktsüka. Küm pezü san ama, pongububa kumbo "TSÜNÜ" Anogo ka atema asen ayak melentsü na? Alima ajonga dang küm 150 ajungba nungtem nung, Longjemer mapa-tajung inyakti ta ayimtenertem ola to, Ya tashiang inyakteter na!

Kaket rongnung kaket,temeshi lai nungji repringangjo! Ayatai korazin! Ayatai Bethsaida! Kesa olaji tanü Tsüngremi AOR dang ayimoktsüdar ni... Pa ola-ji paitoktsü makok.

OH! Kapernaum...Na anung tonga mesotsü ama! OH! AORTEM...Na yamai ngasangatemtsü na? Teküboki alutsü. Khristan yimsü tangar kin dangi tama bener aru asübo, Parnokbo ochi puküm nung tanü nokdaka lila.

Tarutsü lanur tia nükladanger..Ojala nungertemi. Ozü chir,semchir tashi pi lar akümstsü no ta. Aki tzürapur lenirtembo ochi nung matsüngshi. Sen menükshi,mashioktsü, Aorji Tsüngremi shimtet ta kuli sütet. Parnok temang ali kümogo,saka par ochi mapabo kodanga masütsü. Aor senmangbo taremsük,temeim,ochi, kichiba seplasephir. Tangar kin indang tejembi, asen Ao kin indang shisadangang. Süko meyi-ang,tekolak angüma luang,kinüklen jaja-ang.

Aortem, nü adianu dangbo tangar-ang taoba ta pilemer asü, Aor azü melener,tangar kin kümnür asü, Aor dangbo tangar-ang tajungba ta jembir asü. Aor ayak yoktoker pi ayak-ang tajungba ta nukshir asü, Ni Aor chanu ta sayutsü melena ni tangar chanu ta sayunür asü. Aseni sayuba nübori Aor arishir,tanübo shiruru ama amshir. Lenir tajung aika ajemoktsüogo,anosa Aor lanur tajungtem anisatsür, Aya...a...a... Aortem,ya kichi kolok aten, meshisadangerana!

Angadangangjo! Tejaklen,tesülen nanung olaji, Itemji asen Aor jala japaso,semchisemnurtem masü no? Tamapurtem shidak lilasang "NONG NI" ta Aori shitetla. Aor amai nenoka meranga mapa tamajung inyakang ta ashitsüba dang. Tambusü agi mazü ya koma süla. Election mapangbo Tsüngrem ya takdang ka nung shibanga ayur asü, Alima menüdong kümdar,kichiba telemtetba ka magiteter. Ya shirnoki menentsür asen Aor sobaliba tajung to.

Hai Aortem,vote ka yong gari ka- Na talangka mementetstsü. Sen yong nisung tepseter asü-Na Tsüngremi tatok magütsütsü. Yi tebang ka,jemer rara menar asü- Yi jagi na tepsetstsü. Na kanga "HERO" ta pilemer asü - Na akoker aika lir. Temeyong ka jenjang Lak agi ayoker asü- Tashidak nung tali indoktsü. Nür yimtsüng nung na kanga ulur asü- yim atener nü kija asütsü. Aor dang nungibo tangar kin taoba asü- ken asoshi dang asütsü, Tarutsü nung nü dang Aor yimli ayoker ta ajatsü. "GHONDA ISHIKA ANÜNGA LIR,AORTEM DEN TSÜNGREMI KEN JEMBINÜR".

# Iran sorkari tepuokdak alir Khristan ana dang tai atok

**February 25, 2023:** Iran sorkari Muslim yimsü toktsür Khristan yimsü agizükba atema aija tepuokdak puoka aliba Khristan ana dang tai toka chiokogo, ta International Christian Concern (ICC)-i metetdaksü. Iran nung 1979 Islamic Revolution adokba sülen küm shia iba anogomong amongba nungtem nung Iran sorkari tepuokdak alirtem dang tai atoker. Islam yimsü toktsür Khristan yimsü agizüker, Hadi Rahimi

küm ka dak tali tepuokdak aliba sülen February 20 nü chiokogo, aser kasa Arogo nung züingsem, Saheb Fadaie-a küm 5 tashi tepuokdak aliba sülen February 9 nü chiokogo. Khristan ana jagi house-churches ayongzükba aser 'Zionist' Christianity" ajungkettsüba ajanga linük security anema inyakogo, ta aija tepuokdak puoka liasü. Khristan anapronglaji Iran nung jail tamajungtiba- Evin prison nung puoka liasü. Tesüiba küm ishika tsüingda iba jail nung

Khristan aika puokogo. Iran nungbo Islam yimsü toktsür Khristan yimsü agizükertemji Khristantem ama mezüingshir aser Khristan yimsü benshitsü atema temeden magütsür. Tang Hadi aser Saheb na chioka parnok kibong den longjemba ya Khristantem atema tepelatsü osang ka lir, ajisüaka Islam yimsü toktsür Khrista agizüker Khristantem aika Iran nung aliba jail balala nung timtemdar, ta ICC-isa metetdaksü.

# 'Jesus Revolution' film online ajanga angati repringtettsü

**February 25, 2023:** 'Jesus Revolution' film February 24, 2023 nü theater nung sayaogo aser iba film ya online ajanga angati repringtettsü, ta osang ka ajanga metetdaksü. 'Jesus Revolution' film ajak 123movies & Reddit, Imovies, 9movies aser yes movies ajanga download sütetstsü mesüra angati repringtettsü. Jesus Revolution film ya Pastor Greg Laurie-i pa taküm otsü züluba kaket nung ajemdaker yangluba film lir. Iba film otsü nung Greg lanur asüba mapang nung 1960

aser 1970s mapang pai Southern California nung "Jesus movement" nung shilem agir; tatemtsabo iba movement ya North America aser Europe tashi prokshia liasü. America nunger puti otsü nung revival tulutiba adokba nung ajemdaker Jesus Revolution film ya yanglu. Jesus Revolution film ya Bodhbar February 22, 2023 nungi screening asü aser February 24 nü alima tesem ajaklen sayaogo. Tang tashi nungbo Jesus Revolution ya theater nung dang repringtettsü, iba sülen

Vudu, Amazon, Apple aser YouTube ama digital platforms nung 'rent' sütetstsü mesüra alitetstsü. Jesus Revolution film ya kong mesüra kodang nungi stream asütsüar memetet saka movie production aser distribution companies (Lionsgate & Kingdom Story Company)-i iba film ya linük kar nung stream asütsü, ta metetdaksüogo. Yaküm Lionsgate-i iba film stream asütsü atema The Roku Channel aser Peacock naprongla den tezüingzüktep agia liasü.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Padong**

(n) kibong nung tebur chanu, senmanger (son)

\* Kibong nung **padong** sosembaji temoatsü tulu.

**Paidok**

\* (v) majurunüba agi len melen (divert)

\* Onok ajak lenmang tamajungbalen **paidoker** ao.

**OLONG PAITEP # 6440**

1			2			3			4	
			5		6		7			
8										
			9							
	10									
									11	12
			13				14			
15						16				

**TIPLÉN**

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T \_ \_ \_ lu - (3)
- 10. Takdang temalen - (9)
- 11. Tesa \_ \_ \_ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsünsak-mopung - (5)

**LANGTSÜNGLEN**

- 1. Reprangdaksü - (4)
- 2. \_ \_ \_ ur - (3)
- 4. Kiojen yangludak - (6)
- 6. \_ \_ \_ \_ \_ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemldak - (6)
- 12. \_ \_ \_ \_ adenshi - (4)
- 14. Tsünusenbongtsü adokdak - (3)

**OLONG PAITEP # 6439 TELANGZÜBA**

**TIPLÉN :**

- 1. Nüngtuko, 5. Labi, 6. Kasa,
- 7. Atu, 8. Tangar, 11. Petinu,
- 15. Nao, 16. Süin, 18. Tesangwa.

**LANGTSÜNGLEN :**

- 1. Nükshi, 2. Nashi, 3. Olung,
- 4. Kima, 9. Ain, 10. Ajunga,
- 12. Tenet, 13. Anüng, 14. Alar.



**ALOKBAI KINUNGTSÜ ASHIOKTSÜR :**

Alokba mapang shia office nungi shilang dang kidangi moi medemertem den carrom sa saia senzü, aser aji Waraklai kanga maginü. Künü nikongtsütsü office temer office medemtsür ka kidangi oa kazü dang kanga menur, joko koda masü tasa ka atonga, medemtsür la dang Alokbai ashir.

**Alokba** : Honey, nabo powder pongdang lira khen kwa ni?

**Medemtsür la** : Lirto, ang ya agiang.  
(Alokbai powderji pa süoshi, tetsüng tepen ajak nung mezür kidangi shilanger)

**Warakla** : Alok, kechi yamai menua shilanger?

**Alokba** : Taonungbo ni kütonger kidang küna kazür arura.

**Warakla** : Tiyazü tejembima, na carrom board saier arur südi? Ji nü süoshi sünga powder likaji, onok khenyongi ashioktsütsü temerangma, saalaa!

(MORAL : Alokba-a tetidangbo Alok masü)

~ Lilir : WhatsApp

**Abiogenesis-i Aadi Mohatsov Festival nung shilem agi**



**Dimapur, February 25, 2023 (TYO):** February 23 nikongdang Abiogenesis-i Aadi Mahotsav nung shilem agia liasü.

Iba Mega National Tribal Festival ya Major Dhyan Chand National Stadium, New Delhi nung ayonga among aser Abiogenesis-i Naga Howey

music ajanga tesentepertem jangratemdaksü.

February 16 nü Prime Minister Narendra Modi-i Aadi Mahotsav lapoktsü aser February 27 nü tembangtsü.

Ministry of Tribal Affairs indang National Tribal Festival ya North Central Zone Cultural Centre (NCZCC) ajanga ayongzükter aser lisopur indang culture, crafts, cuisine, commerce & traditional art benjunger.

Taküm Mahotsav nung tribal artisans 1000 shi shilem agir. International Year of Millets celebration nung ajemdaker lisopurtemi tsünüba Shree Anna indang shilem balaka agir.

Aadi Mahotsav nung states/UTs 17 nungi nisungtemi shilem agir.

**Congress-i dang Naga yimten latettsü aser Nagaland longjema ayutsü**

**Dimapur, February 25, 2023 (TYO):** Congress-i dang Naga yimten latettsü aser Nagaland ka akümba nungittsü, ta Nagaland Congress president K Therie-i ashi.

kümdaktsünür" ta Therie-i ashi. Tanga political party temi Naga nunger atema süoki ia mebilemer aser candidate aika alizüng kecha melii election nung tokteper. Anungji telemtet shitak agitsü menua mali, ta paisa ashi.

"February 27 election sülen party kechaia sorkar akümtsüsa menden mangutsü aser teloktep yanglua alirtem den mepetmesü adoktsü. Idangji Nagaland

lokkaa meyoktsü atema secular political party tem külemi longjemtsü" ta Therie-isa shisem.

Congress national president Mallikarjun Kharge-i Nagaland semdangdang 2024 küm Centre nung Congress-i taruba sorkar akümtsü ta sangoktsüogo aser iba ajanga BJP aser parnok den yaritepba teloktemi timtem ajurutsü, ta paisa ashi.

**Tinsukia nung Eastern Naga National Government züngsem 3 apu**

**Dibrugarh, February 25, 2023 (Agencies):** Hokolbar nikongdang Assam kübok Tinsukia district nung sepaitemi ENNG (Eastern Naga National Government) züngsem 3 apu.

indang STF den külemi mita aodang ENGG züngsem asem apu" ta Tinsukia superintendent of police Abhijit Gaurav-i ashi.

"Parnok ket nungi .32 mm pistol, magazines ana aser injang aika ngutetogo" ta pai ashi.

Tawa tu Arunachal police-i Changlang district nung India-Myanmar arrtsü anasa ENNG telungpurtem indang tesep ka makdoka liasü. Idangji parnoki prangpong-injang aika ngutet.

"ENNG telungpurtemi Arunachal Pradesh eastern region nung alirtem dang

tashiyim agi sen saru aser sepaitemi tawa parnok anema mita aodang NSCN züngsem aika puogo" ta osang ka ajanga ashi.

Sepaitemisa Assam-Arunachal arrtsülen ENNG telungpurtem anema mita ogo. ENNG züngsem teimbaka Myanmar nung training agirtem lir.

ENNG ya January 2016 küm tentet aser parnoki Arunachal Pradesh kübok Tirap, Changlang aser Longding district tem nung kanga bulua inyaksangshir.



February 24, 2023 nü Itanagar nung Contact Base aser Arunachal Tourism Department na den longjemer US Consulate General Kolkata-i anepalua adokba kakat ta tenüng agi " The Arunachalis - Living with Nature" sayaba noksa nung angur. Iba kakat nung ya Arunachal Pradesh nung aliba lisopur kin 17 indang sobaliba dak aketba chiyongtsü, kiojen, abensüoshi, tamangba yimsü aser benjongbentsü tapu balala indang tapu 11 lemsar enokja lir. Arunachal Pradesh Tourism department nung Advisor, Wb.Laisam Simai aser Kolkata nungi U.S Consulate General Melinda Pavek nati tongti shilem agia iba kakat ya sayaja liasü. Iba mapa ya U.S Department of State nung Ambassadors fund for Cultural Preservation (AFCP) teyari ajanga inyakba liasü.

## Turkey, Syria menoknok lendong nung asür 50,000 adenogo



Hopta ka tejakdang menoknok tesashi anoka nisung 50,000 dak tema tepsetba den ki aika ajasa raksaba sülen Honibarnü ano Turkey nung menoknok ka anoka liasü. Honibarnü anokba menoknok ya 5.3 magnitud tesashi liasü aser menoknok indang epicentre ji Nigde province liasü, ta Turkish disaster agency-i metetdaksü.

**Ankara, Tsüklai/February 25 (Agencies):** Iba ita tetenzüklen menoknok tesashi agi Turkey aser Syria na dak kongshiba sülen iba lendong nung asür 50000 dak tema kümogo.

Turkey kija nunga menoknok lendong nung asür 44,218 jungogo, ta linük indang Disaster and Emergency Management Authority (AFAD)-i Hokolbarnü metetdaksü aser Syria nunga nisung 5914 asüba osang metetdaksüogo.

February 6 nü mezüngbuba 7.7 magnitud tesashia menoknok ka agi southeastern Turkey aser northern Syria kongshi aser iba sülen mapang tatsüka lir ano 7.6 magnitud tesashia menoknok ka agi iba tesem anokshija liasü. Iba tesem nung ano aftershocks 9000 dak tema ajanghiogo, ta AFDA-isa metetdaksü.

Volunteer tem densema teküzmüker 240,000 shi-i maneni Turkey kübok menoknok agi kongshir aliba provinces 11 nung inyaksangshidar. Tesem kar nungbo mezüngbo teküzmükba

maparen inyaksü asoshi mekoki liasü, saka teküzmükba maparen maneni inyakdar aser te k ü m z ü k e r t e m inyaksangshiyonga aoba mapang nung asürtem timba küma odar.

Hopta tsüngda taküm kümzükerkem osangbo kecha mali.

Turkey kija nunga lendong agi kongshir aliba tesem nungi nisung 530,000 aninogo aser Turkey sorkari ashiba agi, ki 173,000 chirepba mesüra raksaba osang metetdaksüogo aser nisung million 1.9 dak tema khen atema yangluba tejenokdak mesüra hotel aser public facilities tem nung jenoka lir.

Turkey nung menoknok agi nisung million 20 shi dak kongshio agi aser kasa mapang nung United Nations-i ashiba agi, Syria nunga menoknok agi nisung 8.8 million shi dak kongshio. Syria nungi osang peria marur, kong nürtem küm aika civil war adoker aliba ajanga timtem tekangshi tulu nung lir.

Lendong nung taküm kümzükerkem aika southern

Turkey toktsür ogo mesüra sükitem, container kitem aser tanga sorkari teyari agüja lidaktsüba kitem nung jenoka lir.

Turkey tir Recep Tayyip Erdogan-i kitem küm ka tsüngda yanglushitsüsü tenangzüka agütsüogo, ajisüaka mongintemi ashiba agi, ketdangsurtemi mapa kara inyaksü memerangi tamasa nürtem kümzüka toktsüsü atema inyaksangshitsüla.

"Sorkari ki tasen asütsü atema foundation tasen March ita tashi nungbo azüngtsüsü aser küm ka tsüngda nürtem nem ki tasen agütsüsü nangzüko," ta Al Jazeera osangbener Hashem Ahelbarra-i Kahramanmaraş yimti nungi osang agüja liasü.

Kitem karbo menoknok tizüktsüsa yanglur liasü ajisüaka tawa menonok anokba mapang chirepogo.

Mongintemi aftershocks tem manen tashi kisü metenzükttetsü ta shiaka sorkari tensa azüoktsü aser ki tasen yanglutsü atema takokba tashi inyaksü," ta pai shisem.

## Ukraine Tir Zelenskyy-i China Tir Xi Jinping ajuruner

**Kyiv, Tsüklai/February 25 (Agencies):** Ukraine Tir Volodymyr Zelenskyy-i China Tir Xi Jinping den ajurutepa Ukraine nung rara tembangtsü asoshi Beijing tasa jembiner ta ashi.

Russia-i amak tenzüker küm ka ajungba anogo nung jembidang, par tasa ajanga yimjung bushiba nung China densema aliba sayur, ta pai ashi.

"China-i Russia nem nok-nü magütsüsü ta ni tamang kaner," ta pai ashi.

China-i yimjung ken o aser linük temeden asoshi jembitsü sentong lir.

Ajisüaka onük 12 aliba kuli kakat nung Russia-i Ukraine nungi par sepaitem anizüker aotsüla, ta tejangja shia mali aser parnoki 'unilateral sanctions' amshiba aitsür, koba Ukraine-i anüolen linük den tesendaktep aliba aitsür amai lir.

Zelenskyy-i Xi den senden amentsü ayongba atema China ketdangsurü yimjak nung telangzüba agüja mali.

Kasa mapang Russia-i China nung yimjung tasa atema tenüsang agüja liasü. "Beijing tangatetba onokia lemsateper," ta Moscow nung aliba foreign ministry ajanga sangdong ka nung ashi.

Beijing-i Russia nem hadir aser injang agütsüsü asadanger, ta US Secretary of State Antony

Blinken-i hopta tetenzüklen ashiba Beijing-i khenyongi magizük. China sorkari Moscow nem drones aser artillery shells agütsüsü asadanger, ta ano Hokulbarnüa American media nung sangdonga liasü.

China sentong indang asüngdangba mapang, "Putin-i pela agizüker alinung ibaji kodaser ajungtsü?" ta US Tir Joe Biden-i Hokulbarnü langzüa liasü.

"Russia dak alaka dangar shinga ajangzüktsüsa iba sentong nung ni kecha monguteter," ta pai ashi.

China indang top diplomat Wang Yi-i Bodhbarnü Moscow semdanga Tir Putin aser Foreign Minister Sergei Lavrov ajuruba sülen China nungeri iba tasa ya benok.

Russian lenirtem den jembishinü akaba sülen, Moscow den yimtenren tsütsü taroktiba nung tamang kateptsü aser tongtipang tesendaktep tsütsü tashi itshitsü Beijing-i molunga lir, tab Wang-i ashi.

Tang tesüsa benokba tasa atema anüolen linük lenirtemi junga agizüka mali. NATO tekolakba Jens Stoltenberg-i ashiba agi, Beijing dak tamangtsü maka kechiaser ozüngi memelai Ukraine amakba parnoki maitsü.

Tir Putin-i tashi ajak amshia February 24, 2022 nü Ukraine amak tenzüker aser anogo ishika

tsüngta Ukraine north, east aser south tsütsü Russian sepaitemi takok tulu ngua liasü.

Saka linük yimtiba, Kyiv nung amakba kera meyiptsü aser Ukraine mitkar temi tesem tulu tanaben meyipya agia liasü.

Iba rara ya Europe nung World War II sülen tulutiba lir aser ibai tanen makai amakba ajanga tashi ajemdaktsüba rara ka akum.

Hokulbarnü Kyiv nung osangbener senden ka nung jembidang, tembar linük ajungai nangzüka ama inyakra takok angutsüsa, ta shia liasü.

Poland-i Ukraine nem German-made Leopard II tank pezü agütsüogo aser ano tali yoktsü renema lir, ta ashi. Germany-ia Leopard tank 14 agütsüsü ta ashi aser Spain aser Canada linük temia tank tem yoker.

Ukraine nem mitkar tsütsü teyari tulutiba agütsürji US ya lir aser parnoki par indang M1 Abrams tank 31 yoktsü nangzüker aser UK-ia Challenger 2 tank 14 agütsür.

Russia aija General Assembly nung vote agütsüdang Africa aser Latin America nungi linük aikati shilem magiba sülen item linüktem den jembishinü peria mesütet, ta Ukraine leniri ashi.

"Onoki küm aika junga meinyak, onoki temolung magütsü, ibaji aibelen tulu liasü," ta Zelenskyy-i ashi.

## MENUNGRA BILEMTETER



Asür Tiatemshi Longsa (26-02-2022)

Temeim oba, nai onok toktsür or küm ka abensar, saka onok mulungjang nung teti na menungra bilemteter aser amatsü makoker.

Tanü na bilemteta sarasadema amonger.

~ Temeim Kinungtsü, Chirnur aser Kinungertem.

## Pakistan aser Afghanistan na arrtsü lapokogo

**Islamabad, Tsüklai/February 25 (Agencies):** Pakistan aser Afghanistan nati arrtsü shibanga aliba lapoktsüba sülen teti ama shishilemba aser senzüsenpong tenzüko.

Linük ana tsüngda arrtsü nung crossing tongtibangtiba ya hopta ka tejakdang Afghanistan nung Taliban yimsüsürtemi shibangja liasü aser iba ajanga nürtem aser khu abenba tata gari aika arrtsü nung taolen makai akum.

Pakistan yimtiba Islamabad nung Afghan embassy-i Torkham arrtsü tanaben lapoktsüba osang Honibarnü Twitter ajanga sangdonga liasü. Pakistan nung ketdangsurtem aser Afghanistan nung Taliban-i shimba Nangarhar province nung ketdangsurtemi arrtsü crossing lapokba osang sangdongogo, ta AP news agency-i metetdaksü.

"Yashi onoki Pakistan nung atema arrtsü khen atema lapoktsüogo shirnok Afghanistan tsütsü taolen makai sabangaer liasü. Iba sülen linük anaprongla nungi shishilembatsü, transit aser nürtem senzüsenpongtsü atema Honibar anepdang lapoktsüogo," ta Pakistan arrtsü ketdangsur kati ashiba Anadolu Agency sangdong ka ajanga metetdaksü.

Linük ana arrtsü nung km 2,600 tang tashi mebenteti lir aser iba atema küm aika mangatetep adoka arudar. Torkham crossing ya Pakistan aser Afghanistan na tsüngda nürtem senzüsenpongtsü aser khu belenshitsü atema tongtibangtiba point lir.

Iba osang sangdongba ajanga taoba Deobarnü nungi arrtsü lapoktsü ata alirtem kanga pelatepa liasü. Pakistan-i Afghan nung migrant tem medical teyari agitsü atema temelaba magütsü ta shia Islamabad aitsü aser iba tesem shibangja liasü.

Taoba Hombarnü Afghan Taliban forces aser Pakistan border guards na khatap aser iba mapang Pakistan nung sepai

ka yirua liasü. Iba sülen ken o bentettsü atema linük anaprongla nungi ketdangsurtem sensaksema aruogo. Linük anaprongla nungi nürtemi tangsa tang arrtsü lapoktsüsü ahangba mapang ka nung iba jenjang agiogo.

Bodhbarnü Pakistan defence minister Khawaja Muhammad Asif aser secret service chief Nadeem Anjum na Kabul-i ao aser arrtsü shibangba aser tanga ken o Taliban nung ketdangsurtem den sensaksema liasü.

Kabul semdangba sülen Afghan Taliban-i, tata gari meyirejang aika bangdaka aliba kar chiochtsü asoshi arrtsü ken atema lapoktsü. Anosotsü, süngjanglijang aser tanga shizüka aotsüba chyongtsü bena aliba garitem chioka liasü.

Ajisüaka Pakistan-i Brehostibarnü arrtsü shibangtsü aser ashiba agi, Afghan nung ketdangsurtemi Deobarnü arrtsü ajungbena shibangtsüba kuli agitsü nungdaker.

Pakistan aser Taliban nung ketdangsurtem Hokolbarnü sensak asem aser arrtsü lapoktsü atema mulungtepa liasü.

Hobibarnü Pakistan-Afghanistan Joint Chamber of Commerce and Industry director Ziaul Haq Sarhadi-i, "Torkham crossing ya shishilembatsü aser nürtem senzüsenpongtsü atema lapoktsüba pelashishia sangdonger," ta ashi.

Kasa mapang nung Tehreek-e-Taliban Pakistan (TTP) züngsemtem kümzüka ayuba atema Pakistan sorkari Taliban aitsüogo. TTP pur dang ya Pakistan Taliban ta ajar. Ajisüaka iba taittsüba ya Afghan Taliban-i magizük.

Ita ishika tsüngda TTP puri asendenshir Pakistan nung tesem balala amak tenzüko aser iba mapang nisung aika tepsetogo.

TTP pur ya Afghanistan nung Taliban den sendaktepba aliba telungpur telok ka lir. Parnok küm ter dak tema Pakistan sorkar den rara arudar.

## Pune, ATP Challenger Event atema Nagal, Arjun na nem Wildcards agütsü



Sumit Nagal &amp; Arjun Kadhe

**Tsüklai/February 25, 2023**

**(Agencies):** Indian Davis Cup team züngsem Sumit Nagal aser Arjun Kadhe na nem PMR Open ATP Challenger 100 Mens International Tennis Championship main draw atema wildcards agütsüogo. India nung asayatem rongnung Nagal kija Challenger Series event nung asaya arudar.

Iba ATP Challenger, koba küm pongu atema tenanzüktepba ka kübok Pune Metropolitan Regional Development Authority (PMRDA)-i sponsor süa asayar, iba asayamung ya February 26 nungi March 5 nü tashi asayatsü. Iba asayamung nung linük 25 nungi asayartemi shilem agitsü.

Pune nung asayatsü aliba asayamung ya Maharashtra State Lawn tennis Association (MSLTA)-i ayongzüka Balewadi Tennis Stadium nung

asayatsü aser iba ya India nung asayaba ATP Challenger 100 events tasembuba lir. Mezüngbuba asayamung ana ya Chennai aser Bengaluru nung asayaogo.

PMRDA Commissioner Rahul Mahiwal (IAS)-i ashiba agi, PMR Challenger ya Pune tennis atema takok ka lir. "Iba amala international asayamung tongtibang ka nongita yaritsü maongka anguba atema PMRDA kanga pelar aser iba ajanga Pune Metropolis Region noksa alima matsüngdang ajungkettsü," ta pai ashi.

"India nung asayatem international asayamung nung shilem agitsü atema maongka agütsü aser saisapong ajungkettsü atema PMRDA pur iba sentong nung shilem agir," ta paisa shisem.

Iba asayamung atema senpet USD 130000 (Rs 1.06 crore) asütsü. Takoker nem ATP

ranking points 100 aser USD 17650 (Rs.14.47 lakh) agütsü aser runner-up nem ATP points 60 aser USD 10380 (Rs.8.5 lakh) aser mezüngbuba round nung tamakok angurtem nem USD1270 (Rs.1.04 lakh) agütsü. Qualifier tem nem USD 380 (Rs.31,000) agütsü.

MSLTA Hon Secretary aser Tournament Director Sunder Iyer-i, "PMR open Challenger ajanga onok asayatem nem ATP points agüja ajangzükdaksütsü aser iba ajanga parnok ranking tajungba akümtsü. Taküm January nungi March ita tashi nung linük nungi asayatem nem ATP point 700 ngutettsü asoshi maongka agütsü," ta ashi.

Linük 25 nungi asayatem iba asayamung nung toktepa asayatsü imlar.

Main draw nung asayar 23 densema lir kong indang indang shimer 23, wild card 3 aser qualifiers 6 densema lir. Qualifying nung asayar 24 aser wild card 4 densema lir.

Taipei nungi arishi küm 21 tain world No, 108 Tsen Cheun Hsin ajak dang temaba jenjang nung lir. Taoba mapang nung Pune nung KPIT Challenger koker alisang Australia nung James Duckworth (ranked 137), Austria nung arishi küm 26 tain Sebastian Ofner (ranked 152), arishi küm 27 tain Great Britain nung Peniston Ryan (ranked 159). Arishi küm 19 tain Italy nung Luca Nardi (ranked 164) aser Italy nungersa Flavio Cobolli (ranked 172) nung iba asayatem asütsü imlar.

## WTT Star Contender: Kamal, Sathiyam, Manika nungeri anir India team asayatsü

**Tsüklai/February 25, 2023**

**(Agencies):** Commonwealth Games nung medal aika ngur aliba India nung asayar Achanta Sharath Kamal, G Sathiyam aser tetsürtem rongnungi temaba jenjang nung asayaba asayar Manika Batra nungeri anir India team World Table Tennis (WTT) Star Contender Goa 2023 nung shilem agitsü.

Iba asayamung ya Panaji nung February 27 nungi March 5 tashi asayatsü.

WTT Star Contender ya India nung asayatsü aliba table tennis asayamung tulutiba lir, kong temaba jenjang nung asayaba international asayatem Dr. Shyama Prasad Mukherjee Indoor stadium nung toktepa angutsü.

India nung rongnungi asayar tejen Sharath Kamal den Sathiyam Gnansekaran, Payas Jain aser Wesley Do Rosario nung tebur kija asaya nung asayatsü. Tetsür kija asaya

nung Manika Batra-i anir Sreeja Akula aser Suhana Saini na asayatsü.

Iba asayamung main draw ya March 1 nü tenzüktsü aser qualification ya February 27 aser 28 nü asayatsü.

"WTT Star Contender Goa ya India nung table tennis asaya nung tongtibang mapang ka lir aser iba asayamung nung shilem agitsü atema yongya atar. Iba asayamung ajanga India nem world-class table tennis asayamungtem ayongzüka asayatsü atema tashi aliba sayatsü atema maongka agütsü aser linük nung lanur asayatem ajungmesoa iba asayar renloka aotsü imlar," ta Achanta Sharath Kamal-i ashi.

Iba asayamung nung China nungi nungtugu asayar aser reigning Olympic Champion Ma Long, World No.1 Fan Zhendong, Japan nungi Wang Chuqin aser Tomokazu Harimoto aser Truls Moregardh nung ajak tebur kija asaya

nung shilem agiba angutsü. Tetsür kija asaya nung World No. 1 Sun Yingsha aser reigning Olympic Champion Chen Meng na densema temaba jenjang nung aliba asayar pongui shilem agiba angutsü.

Tabur tarep asaya nung India nung Sharath Kamal aser G Sathiyam na lenisüba nung asayatsü aser Harmeet Desai o Manav Vikash Thakkar natia shilem agitsü. Tetsür tarep asaya nung Manika Batra aser Archana Girish Kamath na aser Sreeja Akula o Diya Parag Chitale nung asayatsü.

Tarep temeyoktep asaya nung Manika Batra aser G Sathiyam na, Manav Thakkar aser Archana Kamath na aser Suhana Saini aser Wesley Do Rosario na ta asayaba angutsü.

Qualification round nung tebur kija asaya nung India nung asayar 13-i shilem agitsü aser tetsür kija asaya nung asayar 15-i shilem agitsü.

## Carlos Alcaraz Rio Open Semifinals tongogo

**Tsüklai/February 25, 2023**

**(Agencies):** World number two asayar Carlos Alcaraz-i, ATP Rio Open quarterfinals nung 6-4, 7-6 (7/0) agi Dusan Lajovic koka semifinas-i iogo. Asaya nung set anaprongla nung pai mekoki aliba nungi meyipa arur asaya koka liasü.

Arishi küm 19 tain asayar yagi tang agi tasembubba arishi küm 32 tain Lajovic kokogo, kong taoba hopta Argentina Open quarterfinals nung Serbia nung asayar ya akokba densema lir.

Yiruba ajanga ita pezü tashi masayateti Australia Open nunga shilem magitetba sülen Alcaraz-i Argentina Open ya koka liasü.

Semifinal nung pa Chile nung Qualifier Nicolas Jarry den asayatsü, shibai Argentina nung asayar Sebastian Baez 6-3, 7-6 (7/3) agi koka liasü.

Alcaraz-i taoba küm iba asayamung koka pa ATP 500 title ka abenba asayatem ronung tanobusang aküm aser taküma iba asayamung akoktsü atema merangdar.

Kasa mapang nung British nung asayar Cameron Norrie-ia 4-6, 6-1, 6-4 agi Bolivia nung asayar Hugo Dellian koka semifinal-i iogo.

Alcaraz-i 2023 küm asaya tenet asayaba ken danga

tamakok ngua mali.

"Asaya kanga tebenja liasü. Dusan forehand aser backhand naprongla kanga tajung aser iba den serve aser shot tem kanga junga asayar aser tanü pai aji sayuogo.

"Ajisüaka nia kanga junga asayaogo aser tatem nung takok ngutetba atema kanga pelar," ta Alcaraz-i ashi.

Asaya nung set anaprongla nung Alcaraz 4-2 agi tesülen liasü ajisüaka pai kanga meranga asaya set anaprongla kokteta liasü.

Pai winner 32 aser Lajovic-i 13 angu aser pai net nung point 17 nungi 16 nguteta liasü.

Ajisüaka pai unforced errors 25 tashi mena aser iba ajanga pa set anaprongla nung tetenzüklen pa indang serve break südakja liasü.

Tanabuba seed nung pai Lajovic indang serve ka break süa 4-4 aküm.

Game 11buba nung pa 40-0 agi tejakdang liasü ajisüaka pa indang serve break südaktsü aser taruba game nung set point ka kümzüka tiebreaker asayatsüsa aküm.

Alcaraz-i taoba küm US Open densema asayamung pongu kokogo aser pa ya number one tongteta asayaba asayatem rongnung tanosusang lir.

## PV Sindhu nem Hafiz Hashim-i teyari agütsü



PV Sindhu

atema coach tajung ka aginüa liasü. Pa taoba mapang All England champion lir, shiba temaba jenjang nung asayaogo aser shisatsü aika bena lir. Temaba jenjang nung asayaba asayartemi tetsükdaksütem koda koktetsü aser iba yimya angazüka takok angutsü atema meteta lir," ta Raju-i ashi.

"Onok indang trainees tem dang masü saka onok indang base nung tangaria pa teyari agitettsü," ta pai shisem.

Arishi küm 40 tain Hashim-i ashiba agi, Raju-i taoba küm pa nem iba maongka agütsü ajisüaka pa tanga mapa atema sentong yanglur liasü.

"Iba academy director Pradeep Raju-i taoba küm kü nem iba maongka agütsü, saka ni magizük kechiyong ni BAM den tenanzüktepba yanglur liasü," ta Hashim-i ashi.

"Taoba küm tatem contract tembangba sülen pa kü den tanaben tongtepretep aser ni agizüka liasü. Mezüngbo ni kü indang academy (Hashim Badminton Academy) amenoktsü bilema liasü saka iba maongka ya kanga jungrara liasü. Director-isa All England asayamung atema Sindhu nem teyari agütsü shiogo," ta pai shisem.

Hashim-isa, pa Sindhu coach masütsü, ajisüaka pa indang tajangshibattem lemsateptsü, ta ashi.

**Tsüklai/February 26, 2023**

**(Agencies):** Taoba Malaysia nung asayar aser All England Open champion Hafiz Hashim, Suchitra Badminton Academy, Hyderabad nung adenba sülen India tsürtem rongnung nungtugu badminton asayar PV Sindhu nem teyari agütsü.

Sindhu-i, strength aser conditioning atema iba academy semdang aser taruba ita All England campaign atema la renemshiba mapang Hashim nungi teyari agitettsü.

Hashim-i iba tetushi asayamung ya 2003 küm kokogo aser pai taoba küm Badminton Association of Malaysia kübok junior coach ama inyaka aliba toktsüogo. Tang pai Suchitra academy nung trainees tem nem tangazükba agütsü.

Academy tekolakba Pradeep Raju-i iba osang jangjashitsüogo.

"Suchitra nung asayatem

**BILEMDANGANG**

"Asüküm agi nisung ka atsüzüker."